

प्रादेशिक समाचार एकांश  
आकाशवाणी रायपुर (छत्तीसगढ़)  
प्रादेशिक समाचार बुलेटिन  
(छत्तीसगढ़ी)

18.10 मंगलवार

दिनांक 22.10.2024

\*\*\*\*\*  
\*\*\*\*\*

प्रमुख समाचार —

- राष्ट्रपति नई दिल्ली में राष्ट्रीय जल पुरस्कार के तहत जल संरक्षण के क्षेत्र में सुधर काम करे बर कांकेर जिला के मासूलपानी ग्राम पंचायत ल सम्मानित करीन।
- रायपुर दक्षिण विधानसभा सीट में होवइया उपचुनाव बर कांग्रेस ह आकाश शर्मा ल अपन उम्मीदवार घोषित करीन।
- प्रधानमंत्री किसान समृद्धि सह योजना के तहत मत्स्य कृषक मन बर एन.एफ.डी.पी. में पंजीयन कराना जरूरी कर दे गेहे।

राष्ट्रपति—राष्ट्रीय जल पुरस्कार

राष्ट्रपति द्रौपदी मुर्मू ह आज नई दिल्ली में पांचवां राष्ट्रीय जल पुरस्कार के तहत नौ श्रेणी में अड़तीस विजेता मन ल पुरस्कार दीन। एमा सबले सुधर, राज्य, जिला, ग्राम पंचायत, शहरी स्थानीय निकाय, बढ़िया जल उपयोगकर्ता संघ अउ नागरिक समुदाय सामिल हे। जल संरक्षण के क्षेत्र में बढ़िया काम करे बर छत्तीसगढ़ के कांकेर जिला के मासूलपानी ग्राम पंचायत ल राष्ट्रीय स्तर में दूसरइया पुरस्कार मिले हे। समारोह में केन्द्रीय जल मंत्री सी.आर. पाटिल ह मासूलपानी के सरपंच रमिया नेताम ल ए पुरस्कार दीन। मासूलपानी ग्राम पंचायत ह जल संरक्षण बर एक सौ इकसठ जल शेड बनाय हे, एमा निन्यानवे तरिया सामिल हे। एखरे संग पाछु साल उनचालीस ब्रशबुड, एक सामुदायिक तरिया डी-सिल्टिंग, दू ठिन कुंआ, दू ठिन भूमिगत बांध, तीन ठन गोबियन अउ आने-आने संरचना के निर्माण करे गेहे।

ए मउका म राष्ट्रपति ह किहीन कि केन्द्र सरकार ह जल जीवन मिशन के तहत देस के अठहत्तर प्रतिसत ले जादा गांव वाले मनके घर मन म नल ले पानी के कनेक्शन देहे। राष्ट्रपति ह किहीन कि जल संरक्षण म राज्य सरकार के भूमिका बिसेस हवय। ओमन देस म भूमिगत जल के कमती होय म चिंता जतईन हे।

ए उपलब्धि बर मुख्यमंत्री विष्णुदेव साय ह ग्राम पंचायत मासुलपानी के सरपंच रमिया नेताम अउ जम्मों ग्रामवासी मन ल बधाई, सुभकामना दीन हे। ओमन किहीन कि ए सुध्धर काम ह प्रदेस म लोगन ल जल संरक्षण अउ संवर्धन बर प्रेरित करही।

### रायपुर दक्षिण-कांग्रेस उम्मीदवार

रायपुर दक्षिण विधानसभा सीट म होवइया उपचुनाव बर अखिल भारतीय कांग्रेस कमेटी ह आकाश शर्मा ल अपन प्रत्याशी बनाय हे। कांग्रेस के राष्ट्रीय अध्यक्ष मल्लिकार्जुन खड़गे ह आकाश शर्मा के नाम म सहमति जताय हे। आकाश शर्मा वर्तमान म युवा कांग्रेस के प्रदेस अध्यक्ष हवय। बछर दू हजार ग्यारह म ओमन एनएसयूआई रायपुर के जिला उपाध्यक्ष चुने गीस। उंखर बाद ओमन दू हजार चौदह म एनएसयूआई अध्यक्ष के रूप म निर्वाचित होइस। बछर दू हजार सत्रह म आकाश शर्मा ल सचिव के रूप म एनएसयूआई के राष्ट्रीय समिति म सामिल करे गीस। एखर बाद बछर दू हजार बाईस म ओमन युवा कांग्रेस म संगठन के प्रदेस अध्यक्ष के चुनाव जीतीन।

एखर पहिली, भारतीय जनता पार्टी ह रायपुर दक्षिण विधानसभा सीट ले सुनील सोनी ल अपन प्रत्याशी घोषित करे हे।

रायपुर दक्षिण विधानसभा उपचुनाव बर नामांकन दाखिल करे के प्रक्रिया पच्चीस अक्टूबर तक जारी रइही। ए विधानसभा सीट म तेरह नवंबर के मतदान होही। उन्हें, तेईस नवंबर के वोट के गिनती करे जाही।

## सरगुजा आदिवासी विकास प्राधिकरण

मुख्यमंत्री विष्णुदेव साय की पगरइति म आज सरगुजा आदिवासी विकास प्राधिकरण के बइठका होइस। बइठका म मुख्यमंत्री ह प्राधिकरण के सदस्य मन ले सुझाव मांगे हे। उन्हें, प्राधिकरण के अंतर्गत करवइया नवा काम ल जनप्रतिनिधि मनके सलाह म मंजूर करे बर किहीन। मुख्यमंत्री ह अब तक चालू नइ होय जुन्ना काम ल निरस्त करे के निरदेस दीन हे। बइठका म श्री साय ह सरगुजा जिला म गन्ना उत्पादन के रकबा बढ़ाय म जोर दीन। मुख्यमंत्री ह सरकारी स्तर म नर्सरी लगा के किफायती दर म पौधा उपलब्ध कराय के बात किहीन। ओमन बंद नर्सरी सुरू करे के घलो निरदेस दीन।

## राज्यपाल—सद्भावना सिविर

राज्यपाल रमेन डेका आज भारतीय रेडक्रॉस सोसायटी दुर्ग डहार ले राखे गे राज्य स्तरीय जूनियर रेडक्रॉस प्रशिक्षण सह सद्भावना सिविर के समापन समारोह म सामिल होइन। ए मउका म ओमन किहीन कि रेडक्रॉस न सिर्फ चिकित्सा सेवा अउ आपातकालीन परिस्थिति म मदद करे बर सिखाथे, बल्कि ए मानवता के प्रति संवेदनशीलता अउ सेवा भावना ल घलो बढ़ाथे। ओमन किहीन कि ए सिविर म आपातकालीन सहायता, प्राथमिक चिकित्सा अउ आपदा प्रबंधन के बारे म समुचित प्रशिक्षण दे गीस।

रेडक्रॉस सोसायटी डहार ले राखे गे पांच दिवसीय ए कारीकरम म प्रदेस के जम्मा जिला ले आए विद्यार्थी मनके बीच आने—आने प्रतियोगिता के आयोजन करे गीस। एमा दुरुग जिला ल पहला अउ बालोद जिला ल दूसरइया स्थान मिले हे। कारीकरम म राज्यपाल ह आने—आने प्रतियोगिता के विजेता प्रतिभागी मन ल सम्मानित करीन।

### मत्स्य कृषक—पंजीकरण

प्रधानमंत्री किसान समृद्धि सह योजना के तहत मत्स्य कृषक मन बर एन.एफ.डी.पी. म पंजीयन कराना जरूरी कर दे गेहे। एखर तहत मछली पालन, मत्स्यखेट अउ मछली बेचे के व्यवसाय ले जुड़े जम्मों लोगन मनके पंजीयन कॉमन सर्विस सेंटर के माध्यम ले करे जा सकही। मत्स्य पालन विभाग के संचालक नारायण सिंह नाग ह बतईन कि एन.एफ.डी.पी. के मुख्य उद्देश्य जम्मों मत्स्य पालक, मत्स्य पालन समूह अउ मत्स्य समिति मन बर कार्य आधारित पहिचान के डाटाबेस तैयार करना हे। संगेसंग भविष्य म प्रधानमंत्री किसान समृद्धि सह योजना के तहत मत्स्य पालन म संचालित जम्मों योजना के लाभ मत्स्य कृषक मन ल देवाय जाही।

### जामुल—बायोगैस प्लांट

नगर निगम भिलाई, छत्तीसगढ़ बायो फ्यूल प्राधिकरण अउ भारत पेट्रोलियम के बीच कंसेशन एग्रीमेंट म हस्ताक्षर करे गेहे। एखर तहत जामुल म भारत पेट्रोलियम कार्पोरेशन लिमिटेड डहार ले साठ करोड़ रुपिया के लागत ले कम्प्रेस्ट बायोगैस संयंत्र लगाय जाही। ए संयंत्र के लगे ले नगर निगम भिलाई अउ दुरुग जिला के तीर-तखार के नगर निगम म हर रोज निकलइया करीबन डेढ़ सौ मीट्रिक टन ठोस अपशिष्ट के उपयोग जैव ईंधन उत्पादन म करे जा सकही। उहें, हर बछर प्रत्यक्ष अउ अप्रत्यक्ष रूप ले रोजगार के अवसर बनही। संयंत्र के स्थापना ले ग्रीन हाउस गैस के उत्सर्जन म कमी आही अउ प्रदूषण घलो कम होही।

### सूरजपुर—एसपी

राज्य सासन ह प्रशांत ठाकुर ल सूरजपुर जिला के नवा पुलिस अधीक्षक नियुक्त करे हे। जारी आदेस के मुताबिक सूरजपुर एसपी एम.आर. अहिरे के तबादला पुलिस मुख्यालय नवा रायपुर म उप पुलिस महानिरीक्षक यातायात के पद म करे गेहे। खबर के मुताबिक सूरजपुर जिला म पाछु दिन होय दोहरा हत्याकांड के बाद एम.आर. अहिरे ल हटाय गेहे।

### केशकाल घाटी—मरम्मत कार्य

कोंडागांव जिला के केशकाल घाटी म सड़क मरम्मत के काम सुरू कर दे गेहे। सुरुवाती म धूर्—माटी के सफाई, डब्ल्यू.एम.एम. पेंच अउ बी.टी. पेंच के काम करे जावत हे। ए मरम्मत काम के सेती इक्कीस ले सत्ताईस अक्टूबर तक केशकाल घाटी म भारी गाड़ी मनके अवई—जवई म रोक लगा दे गेहे। संगेसंग दूसर रद्दा निर्धारित करे गेहे। जिला कलेक्टर कुणाल दुदावत ह बतईन कि छोटे चारपहिया गाड़ी अउ यात्री बस मन ल केशकाल घाटी ले आय—जाय के अनुमति दे गेहे।

### खेल प्रतियोगिता

कोरबा जिला म इक्कीस ले चौबीस अक्टूबर तक होवइया राज्य स्तरीय शालेय खेल प्रतियोगिता के सुभारंभ काली कैबिनेट मंत्री लखनलाल देवांगन ह करीन। ए प्रतियोगिता म प्रदेश के पांच संभाग— बस्तर, दुर्ग, रायपुर, सरगुजा अउ बिलासपुर के पांच सौ बीस खिलाड़ी भाग लेवत हे। उद्घाटन समारोह ल संबोधित करत श्री देवांगन ह प्रतिभागी मन ल खेल भावना के संग हिस्सा ले बर अउ अपन सुधर प्रदर्शन करे बर प्रेरित करीन।

उहें, सारंगढ़—बिलाईगढ़ जिला म काली तेईस अक्टूबर के जिला स्तरीय महिला खेलकूद प्रतियोगिता के आयोजन करे जाही। ए प्रतियोगिता म सारंगढ़, बिलाईगढ़ अउ बरमकेला म राखे गे विकासखंड महिला खेलकूद प्रतियोगिता म पहिली स्थान मिलइया महिला खिलाड़ी हिस्सा लीहीं। प्रतियोगिता म एथलेटिक्स, दउड़, तावाफेंक, हॉकी, फुटबॉल वॉलीबॉल, बास्केटबॉल, खोखो, रस्साखींच, बैडमिंटन, वेटलिफ्टिंग अउ कुश्ती जइसन खेल होही।

## मौसम

मौसम विभाग के मुताबिक एक निम्न दाब के क्षेत्र पूर्व मध्य बंगाल के खाड़ी के उपर स्थित रिहीस, जउन ह उत्तर-पश्चिम कोति आगू बाढ़त अवदाब बन गेहे। ए अवदाब प्रबल होके अवइया चौबीस घंटा म चक्रवात “दाना” के रूप म परिवर्तित होय के संभावना हे। ए चक्रवात के गुरुवात के बिहनिया तक बंगाल के खाड़ी के उपर बन जाय के संभावना हे। “दाना” चक्रवात उत्तर ओड़िशा अउ पश्चिम बंगाल के समुद्री तट म टकराही। ए चक्रवात के असर ले छत्तीसगढ़ म बादल छाये रहिही। उहें, अधिकतम तापमान म गिरावट होय म गर्मी ले राहत मिलही। चक्रवात के असर ले दक्षिण छत्तीसगढ़ के कुछेक जिला मन म बरसा होय के संभावना हे।

\*\*\*\*\*

\*\*\*\*\*